



Sumáriu Kazu

Períodu : Novembru 2012
Edisaun : 10 Dezembru 2012

Sumáriu kazu ba semana dahaat fulan Novembru 2012, Tribunál Distritál Oe-Cusse

Introdusaun

Durante loron tolu hahu husi 20 to'o 23 Novembru 2012, JSMP monitoriza kazu krime hamutuk 6 ne'ebé julga iha Tribunál Distritál Oe-Cusse.

Kazu 6 ne'e hot-hotu kazu krime violénsia doméstika. Iha prosesu ne'e kazu 5 mak hetan ona desizaun no kazu ida seluk sei suspende fila fali.

Husi kazu 5 ne'ebé hetan desizaun finál ne'e, tribunál aplika pena multa hotu ho montante osan US\$30,00 to'o US\$ 45,00.

Hanesan ho edisaun sira seluk, sumáriu ida ne'e ho objetivu atu divulga informasaun ba lala'ok julgamentu iha Tribunál Distritál Oe-Cusse iha semana dahaat iha fulan Novembru 2012.

Tuir mai deskripsaun sumáriu julgamentu kompletu:

1. Krime violénsia doméstika Nú. 126/C.ord/2011/TDO

Iha loron 20 Novembru 2012, Tribunál Distritál Oe-Cusse hala'ó julgamentu ba krime violénsia doméstika ho Nú. Prosesu 126/C.Ord/2011/TDO. Kazu ne'e involve Arguidu Silvestre Neno hasoru vítima Juana Colo, ne'ebé akontese iha loron 14 Juñu 2011, iha Suco Naimeco, Sub-Distritu Pante-Makassar.

Prosesu julgamentu hahú hodi lee akuzasaun husi Ministériu Públiku. Iha akuzasaun laran haktuir katak iha loron 14 Junu 2011, mais ou menus tuku 12.00 meudia, arguidu buka xavi armáriu atu foti nia roupa maibé tanba la hetan xavi arguidu estraga tiha odamatan. Tanba ne'é vítima diskute malu ho arguidu no la kleur arguidu tuku vítima nia matan fukun ne'ebé rezulta bubu no metan.

Relasiona ho faktus ne'e, Ministériu Públiku akuza arguidu ho artigu 145 Kódigu Penál kona-ba ofensa ba integridade fizika simples konjugadu ho artigu 2, 3 no 35 alinea (b) Lei Kontra Violénsia doméstika.

Iha julgamentu arguidu rekuñese nia sala no promete ba tribunál katak nia sei la halo tan. Tanba arguidu totalmente konfesa nia hahalok, nune'é tribunál la persiza rona tan deklarasaun vítima no hakat ba alegasaun finál.

Iha alegasaun finál Ministériu públiku husu tribunál atu aplika pena multa ba arguidu tanba arguidu rekuñese akuzasaun husi Ministériu públiku loos.

Entertantu, husi parte defeza husu ba tribunál atu aplika pena ne'ebé adekua ba arguidu tanbá arguidu rekoñese ba faktu no hakarak kolabora ho tribunál. Aleinde ne'e, arguidu promote katak sei la halo tan krime iha fururu.

Depoisde rona tiha alegasaun finál, tribunál konfirma ba parte sira katak julgamentu ba kazu ne'e bele hetan kedas desizaun imediata.

Relasiona ho faktus provadu hirak iha leten, tribunál konklui katak arguidu nia hahalok prienxe rekizitus tuir artigu 145 Kódigu Penál konjugadu ho artigu 2, 3 no 35 alinea (b) Lei Kontra Violénsia Doméstika ne'ebé mak Ministériu Públiku akuza hasoru arguidu. Tanba ne'e, tribunál deside hodi hamonu pena multa ho osan US\$ 30 ba arguidu.

Audiénsia julgamentu prezide husi juíz singular Dr. João Ribeiro, Ministériu Públiku representa husi Dr. Antonio Tavares no arguidu hetan defeza Dr. Calisto Tout husi Eskritóriu Defensória Pública.

2. Krime violénsia doméstika Nú. 34/C.Ord/2012/TDO

Iha loron 20 Novembru 2012, Tribunál Distritál Oe-Cusse hala'ó audiénsia julgamentu hodi lee sentensa ba kazu violénsia doméstika ne'ebé rejista ho Nú. Prosesu: 34/C.Ord/2012/TDO.

Kazu ne'e involve arguidu Martinho Liub hasoru vítima Lina Abit nu'udar arguidu nia kaben, ne'ebé akontese iha loron 13 Janeiru 2012, iha Aldeia Oesilo, Sub-Distritu Pante-Makassar, Distritu Oe-Cusse.

Bázeia faktus sirak ne'ebé produz durante julgamentu, tribunál konfirma katak iha loron 13 Janeiru 2012, vítima mai hakoi nia inan ne'ebé mate iha Dili maibé la fo justifikasaun wainhira atu ba. Hafoin iha loron 20 Fevreiru vítima fila husi Dili arguidu hein iha uma oin hodi tuku, tebe iha vítima nia isin loloon hodi rezulta sofre moras no bubu.

Faktus hirak ne'e tribunál konklui nu'udar provas ne'ebé provadu. Tanba ne'e tribunál konklui katak arguidu kontra duni artigu 145.1 Kódigu Penál konjugadu ho artigu 35 alinea (b) Lei Kontra Violénsia Doméstika ne'ebé Ministériu públiku akuza ba arguidu.

Ikus-mai, tribunál tetu husi sirkunstansia atenuante katak, pena multa mak adekuada liu ba arguidu, tanbá ne'e, tribunál deside hodi fó pena multa US\$30, ba arguidu no sei selu durante loron 30 nia laran ho nia kontazem US\$ 1 dolar kada loron ida.

Julgamentu ba leitura sentensa ne'e prezide husi juíz singular Dr. João Ribeiro, Ministériu Públiku representa husi Dr. Antonio Tavares, no arguidu hetan defeza Dr. Calisto Tout husi Eskritóriu Defensória Pública.

3. Krime violénsia doméstika Nú. Prosesu 32/C.Ord/2012/TDO

Iha loron 21 Novembru 2012, Tribunál Distritál Oe-Cusse hala'ó audiénsia julgamentu ba kazu violénsia doméstika ho Nú. Prosesu. 32/Krime/2012/TDO. Kazu ne'e involve husi Arguidu inisial SR hasoru vítima nain rua ho inisial ILR no PK iha loron 24 Dezembru 2011, iha Suco Cuna, Sub-Distritu Pante Makassar.

Audiénsia julgamentu hahú hodi lee akuzasaun husi Ministériu Públiku. Tuir akuzasaun katak iha loron 24 Dezembru 2011, tuku 19 .00 kalan, vítima sira ba Igreja, arguidu la'o tuir sira no dehan *ohin hau dehan la bele ba Igreja sei ba nafatin* tanba ne'e arguidu nervozu no tebe vítima ILR nia hirus matan no PK nia kelen loos hodi rezulta moras.

Relasiona ho faktus ne'e, Ministériu Públiku akuza arguidu ho artig 145 Kódigu Penál kona-ba ofensa ba integridade fizika simples konjugadu ho artigu 2,3 no 35 alinea (b) Lei Violénsia Doméstika.

Iha tribunál arguidu hili nia direitu nonook. Nune'é tribunál fo oportunidade ba vítima sira hodi hato'o deklarasaun. Husi deklarasaun vítima nain rua katak tempu akontesimentu arguidu tebe sira tanba lakohi tuir nia hakarak no ba Igreja nafatin.

Bázeia faktus sira ne'ebé produz husi audiénsia julgamentu, Ministériu públiku husu tribunál atu aplika pena multa ba arguidu nu'udar autór ba krime hasoru fetu sira ne'ebé loloos arguidu proteze.

Iha defensoria Públiku nia alegasaun finál husu tribunál atu aplika pena ne'ebé adekuada ba arguidu tanba arguidu kolabora ho tribunál maski nia hela iha Dili maibé wainhira tribunál bolu nia kumpri nia dever nu'udar sala nain.

Depois de rona alegasaun finál tribunál suspende fali kazu ne'e ba loron 05/12/2012, tuku 14:00 lokraik.

Prosesu julgamentu ne'e prezide husi juíz singulár Dr. João Ribeiro, Ministériu Públiku representa husi Dr. Antonio Tavares, no parte defeza representa Dr. Calistu Tout husi Eskritóriu Defensória Pública.

4. Krime violénsia doméstika Nú.121/C.Ord/2011/TDO

Iha loron 22 Novembru 2012, Tribunál Distritál Oe-Cusse hala'ó julgamentu ba kazu violénsia doméstika ne'ebé rejista ho Nú. Prosesu 121/C.Ord/2011/TDO. Arguida ba kazu ne'e Anastasio Suriano hasoru Blandina Molo nu'udar arguidu nia feen. Kazu ne'e akontese iha Suco Costa Sub-Distritu Pante Makassar, Distritu Oe-Cusse iha loron 15/8/ 2011.

Julgamentu ne'e hahú hodi lee akuzasaun husi Ministériu Públiku katak iha loron 15/8/ 2011, tuku 08.00 dadersan vítima fo osan US\$ 25 ba arguidu atu sosa simentu, depois liutiha oras rua vítima husu dehan simentu sosa tiha ne'e arguidu hatan katak nia hatene no vítima la lika mete barbarak. Vítma la simu liafuan ne'é, hafoin sira deskuti malu no la kleur arguidu lori vítima ba uma laran depois basa dala rua, tuku dala rua iha oin no tebe dala rua iha kelen hodi rezulta sofre moras no metan.

Relasiona ho akontesimentu ne'e, Ministériu Públiku akuza arguidu tuir artigu 145 Kódigu Penál konjugadu ho artigu 2, 3 no 35 alinea (b) Lei Kontra Violénsia Doméstika.

Iha audiéncia arguidu rekuñese nia sala no arrepende tebes ba ninia hahalok. Entretantu tuir deklarasaun vítima katak tempu akontesimentu arguidu basa, tuku no tebe duni maibé depois liutiha loron ida sira diak malu fali no moris nu'udar fen ho laen no to'ogora sira nunca iha problema.

Iha alegasaun finál Ministériu Públiku mantein ba akuzasaun, no husu tribunál atu kondena arguidu ho pena multa tanba arguidu provadu komete krime violénsia doméstika.

Husi parte defeza nia alegasaun finál husu ba tribunál atu aplika pena ne'ebé adekuaudu ba arguidu tanbá arguidu rekoñese ba faktu tomak, aleinde ne'e nia arrepende ba hahalok no sira diak malu ona.

Depoide rona tiha alegasaun finál, tribunál konfirma ba parte sira katak julgamentu ba kazu ne'e bele hetan kedas desizaun imediata.

Relasiona ho faktus hirak ne'e hotu, tribunál konklui katak arguidu nia hahalok prienxe rekizitus tuir artigu 145 Kódigu Penál konjugadu ho artigu 2, 3 no 35 alinea (b) Lei Violénsia Doméstika ne'ebé Ministériu Públiku akuza ba arguidu.

Tanbá ne'e tribunál decide hodi hamonu pena multa US\$ 45,00 no sei selu durante loron loron 45 nia laran ho nia kontajem US\$ 1 kada loron.

Prosesu julgamentu prezide husi Juíz singular Dr. João Ribeiro, Ministériu Públiku representa husi Dr. Antonio Tavares, parte Defensoria Publiku representa Dr. Calisto Tout husi Eskritóriu Defensória Pública.

5. Kazu krime violénsia doméstika Nú.168/C.Ord/2012/TDO

Iha 22 Novembru 2012, Tribunál Distritál Oe-Cusse hala'ogaudiéncia julgamentu hodi lee leitura sentensa ba kazu violénsia doméstika ho Nú Prosesu. 168/C.Ord/2012/TDO. Kazu ne'e involve husi Arguida Lucia Tout hasoru vítima Antonio Lafu. Kazu ne'e akontese iha loron 30 Juñu 2012, iha Suco Costa, Sub-Distritu Pante-Makassar, Distritu Oe-Cusse.

Bázeia faktus sira ne'ebé produz durante julgamentu, tribunál konfirma katak arguida provadu komete krime ofensas integriadade fízika ho natureza krime violénsia doméstika. Relasiona ho hahalok hirak ne'e, tribunál konklui katak arguida kontra artigu 145.1 Kódigu Penál konjugadu ho artigu 35 alinea (b) Lei Kontra Violénsia Doméstika.

Bazeia ba faktus provadu hirak ne'e, tribunál konvensidu katak arguidu nia hahalok prienxe elementu krime tuir artigu 145.1 Kódigu Penál. Hafoin avalia pena sira ne'ebé Ministeriu Publiku propoin, tribunál tetu katak pena multa mak adekuada liu ba arguidu. Tanba ne'e, tribunál decide atu pena multa US \$ 45,00 (dollar hat nolu resin lima) no sei selu durante loron loron 45 nia laran ho nia kontazem US\$ 1 kada loron.

Prosesu leitura sentensa ne'e prezide husi Juíz singular Dr. João Ribeiro, Ministériu Públiku representa husi Dra. Antonio Tavares, no parte defeza representa Dr. Calisto Tout husi Eskritóriu Defensória Pública.

6. Kazu violénsia doméstika Nú.83/C. Ord/2012/TDO

Iha loron 23 Novembru 2012, Tribunál Distritál Oe-Cusse halá'ó julgamentu ba kazu violénsia doméstika ne'ebé rejista ho Nú. Prosesu 83/C. Ortd/2012/TDO.

Arguidu ba kazu refere Antonio Colo Soco hasoru vítima Linda Lafu. Kazu ne'e akontese iha loron 14 Novembru 2011, iha Suco Lifau, Sub-Distritu Pante-Makassar.

Audiénsia julgamentu hahú hodi lee akuzasaun husi Ministériu Públiku. Bazeia ba akuzasaun Ministériu Públiku nian haktuir katak iha loron 14 Novembru 2011, tuku 21.00 kalan arguidu tuku vítima dala ida iha vítima nia kakorok no tebe dala ida iha kabun.

Tuir mai iha akuzasaun ne'e haktuir liu tan katak kazu ne'e akontese, tanbá vítima fila uma iha oras kalan boot.

Relasiona ho akontesimentu ne'e, Ministériu Públiku akuza arguidu nu'udar autór materiál ho forma konsumada tuir artigu 145.1 Kódigu Penál konjugadu ho artigu 2, 3 no 35 alinea (b) Lei Kontra Violénsia Doméstika.

Iha tribunál arguidu uza nia direítu nonook ka la koho fó deklarasaun tuir artigu 60 alinea (c) Kódigu Prosesu Penál.

Mesmu arguidu hili nia direitu nonook, maibé tuir deklarasaun vítima ba tribunál katak iha loron 14 Novembru 2011, mais ou menus tuku 21.00 kalan, arguidu tuku no tebe vítima tanba kalan husi nia familia no la fo hatene antes nia ba.

Iha alegasaun finál Ministériu Públiku nian, bázeia ba faktus ezaminadu iha audiénsia julgamentu husu ba tribunál atu kondena arguidu ho pena multa tanba arguidu provadu komete krime ne'ebé Ministériu Públiku akuza ba arguidu.

Entretantu, husi parte defeza husu ba tribunál atu aplika pena ne'ebé adekuada ba arguidu maske arguidu la koalia maibé durante tinan ida ona nunca halo krime hasoru vítima no ema seluk.

Depoisde rona tiha alegasaun finál, tribunál konfirma ba parte sira katak julgamentu ba kazu ne'e bele hetan kedas desizaun imediata.

Relasiona ho faktus provadu hirak ne'e, tribunál konklui katak arguidu nia hahalok prienxe rekizitus krime tuir akuzasaun Ministeriu Publiku nian. Tanbá ne'e, tribunál deside hodi atribui pena multa US \$ 45,00 ba arguidu no sei selu durante loron 45 nia laran ho nia kontajem US\$1 kada loron.

Prosesu julgamentu prezide husi juíz singulár Dr. João Ribeiro, Ministériu Públiku representa husi Dr. Antonio Tavares, parte defeza representa Dr. Calistu Taut husi Eskritóriu Defensória Pública.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883